

Nasha: Ulama kurang, tapi masih ada
Malaysiakini.com
June 4, 2011

Mantan timbalan presiden Nasharudin Mat Isa menolak pandangan bahawa pemilihan kali ini menunjukkan sentimen perwakilan menolak kepemimpinan ulama.

Katanya, walaupun bilangan pemimpin ulama semakin berkurangan, namun barisan pemimpin berkenaan masih mempunyai gabungan profesional-ulama.

"Jika mereka tolak ulama, kita tidak akan diwakili tapi (masih) ada beberapa nama yang mewakili ulama.

"Saya tidak kata ada puak seperti itu, tapi saya kata ada latar belakang pemimpin berbeza yang diwakili di sini," katanya.

Beliau berkata demikian ketika ditemui media selepas pengumuman barisan pemimpin baru itu yang menyaksikan pemimpin akar umbi popular, Mohamad Sabu dipilih sebagai timbalan presiden.

Dalam pada itu, beliau turut mengakui bahawa pertandingan tiga penjuru yang disertainya itu menyebabkan undi daripada perwakilan berpecah.

"Pertandingan tiga penjuru ini bagi saya bukan benda baru dan kemungkinan pecah undi itu berlakulah," katanya lagi.

Beliau turut menafikan dakwaan bahawa Mursyidul Am, Datuk Nik Abdul Aziz Nik Mat menyokong seorang lagi calon, Datuk Tuan Ibrahim Tuan Man, yang menyumbang kepada kekalahannya.

"Kita serahkan kepada perwakilan untuk putus dan kita hormati pilihan mereka.

"Apa saja yang diwakili dalam barisan jawatankuasa pusat, kita hormati.

"Saya tak salahkan sesiapa kerana ia hak perwakilan untuk memilih," katanya lagi.

Copyright © 1999-2007 Mkini Dotcom Sdn. Bhd
<http://www.malaysiakini.com/news/166040>